

基督教 ê 精髓

Koh tiòh 用仁慈互相款待，存憐憫 ê 心，大家互相赦免，tú 親像上帝通過基督 bat kā lín 赦免仝款。（《全民台語聖經》以弗所書 4：32）

有一工早起，我叫我主日學 ê 成員，用 in ê 意見指出 teh 描述基督教精髓 ê 聖經節。Tī 聽真 chē 好 ê 建議了後，我引用以弗所書 4：32，he 是神學家 Lai-in-hō-l-do Nî-buh（Reinhold Niebuhr）認為是伊 siōng ài ê 經節。

我相信 chit 節聖經加上約翰福音 3：16，tòh ē-tàng 概括基督教 ê 精髓。它 ê 範圍無真闊；這 m̄ 是哲學論文，這是有關人 kah 人之間 ê 關係。咱每一個人 lóng 是上帝看做是珍貴 ê，而且咱被催迫來對待別人親像上帝 teh 對待咱仝款，甚至雖然咱 lóng 是罪人。

基督 kah 人類每一個人 lóng 有特別 ê 關係。每一個人對祂來講 lóng 是重要 ê，而且祂疼所有 ê 人。耶穌 kā 祂 ê 宣教人性化，專注 tī 個別 ê 迷失罪人；咱知影祂 chit 種個人化 ê 疼，甚至對 hiah-ê tītiān-tiān teh 反對祂 ê 法利賽派 ê 人 mā 是 án-ne。Hō 人 tiòh 驚 ê 是，當一個麻風病人接近基督，雙腳跪落去 ê 時，耶穌用感情回應伊，甚至 kah 伊有身體接觸。祂 kah hit 當時 ê 宗教領袖是 gōa-á-nih 無仝！In 絕對 bē án-ne 做。總是，耶穌摸 tòh 病人，醫好伊 ê 麻風病，然後叫伊去 hō 宗教當局證明伊已經受醫治，因為只有 án-ne，chit-ê 人 chiah ē-tàng koh 受接納 tng 去社會。

雖然基督關心被輕視 ê 人，m̄-koh，咱 iáu 是 tiān-tiān 認為被棄 sak ê 人應該受 tiòh phái 款待；m̄ 是 kan-ta 法利賽派 ê 人認為人受苦是因為上帝已經棄 sak in！

基督關心人類真正 ê 需要，因為祂看 tiòh 欠缺所引起 ê 傷害，像講欠缺教育、健康、社會平等、公義、自由 kah 疼；chiah-ê 人類 ê 苦難提供基督宣教 ê 機會。身為基督徒，咱應該親像耶穌 án-ne 來回應。

祈禱：上帝 ah，我 tī 福音書看 tiòh 基督是 án 怎 teh 回應人類 ê 需要，祂徹底脫離 hit 當時 ê 宗教教導 kah 做法。求祢幫助我學習祂 ê 完美模範，然後模仿它。求祢 hō hiah-ê 描繪祂一生 ê 話語 kah 行為，親像和平、謙遜、關心、赦免 kah 同情，滲（siàm）入我家己 ê 性命，來成做祂 ê 門徒。我奉耶穌 ê 名祈禱。阿們。

（1980.11.16）